



Inatsisartunut ilaasortaq,
Isak Johannessen,
Naleraq
Maani/

**Akuersissutit aamma aallaaniarnermut allagartat § 37 naapertorlugu
apeqqummut nr. 186-2025-imut akissuteqaat**

11-11-2025
Suliap normua: 2025 - 22826
All. nr. 25922355

Inatsisartut suleriaasianni § 37, imm. 1 malillugu aalisarnermut piniarnermullu allagartanik tunniussisarneq pillugu Naalakkersuisunut apeqquteqarsimavutit. Apeqqt suliaasaqarfigisannit akineqartussanngorlugu innersuunneqarpoq.

Postboks 269
3900 Nuuk
Oq. (+299) 34 50 00
Fax. (+299) 34 63 55
E-mail: apn@nanoq.gl
www.naalakkersuisut.gl

1. Aalisartut piniartut illoqarfinnut allanut nuukkallartillutik, soorlu assersuutigalugu aapparisaq ilinniariarneranut, taava kingorna nunaminnut angerlaraqamut aalisarnermut piniarnermullu allagartatik ("licens") annaasarnerinut tusatsiakkat naapertorlugit:

a. Naalakkersuisut taamatut aqquasaqartunik ilisimasaqarpat?

b. Ulloq manna tikillugu qassit qulaani pineqartut naapertorlugit taamatut aqquasaqarsimappat?

c. Aalisarnermut, piniarnermullu, sumiiffimmi aallaavigisami allagartap piginnarnissaanut pisinnaatitaaffeqartoqarpa?

1a pillugu) Aalisartoqarlunilu piniartoqarpoq Kalaallit Nunaanni allamut nuuttartunik imaluunniit nunanut allanut nuuttartunik.

1b pillugu) Aalisarnermut, Piniarnermut, Nunalerinermut Imminullu Pilersornermut Naalakkersuisoqarfimmit aalisarsinnaanermut, piniarsinnaanermut aallaaniarsinnaanermullu allagartanik tunniussaqaqarnermut atatillugu qassit allamut nuussimanerannik nalunaarsuisoqarneq ajorpoq. Aammattaaq apeqqummut 1c-mut akissut takuuk.

1c pillugu) Aalisartut allamut nuukkunik aqutsiveqarfimmit aalisarfigisartakkaminnit allamut nuunnerminni aqutsiveqarfimmi aalisarfigisinnaasaminnut aalisarsinnaanermut allagartamik qinnuteqassapput. Tamatumanili aqutsiveqarfimmit aalisarfigisartakkamit allamut nuuttoqarnerseq apeqqutaassaaq. Allagartatik annaassanngilaat, akuersissutilli pisassiissutilli pillugit nalunaarummi § 18 naapertorlugu aqutsiveqarfimmut nutaamut akuersissummik qinnuteqassallutik. Piffissalli ilaanni assersuutigalugu nammeneq qanigisarluunniit ilinniagaqarpat piffissamiluunniit sivisuumi napparsimasoqarpat akuersissummik qinnuteqanngitsortoqarsinnaavoq, taamaalisoqartillugu akuersissutit

pisassiissutillu pillugit nalunaarummi § 16 naapertorlugu akuersisummik pissarsinissamut immikkut akuerineqarnissaq qinnutigineqarsinnaavoq.

Nunanulli allanut nuukkunik aalisartut Kalaallit Nunaanni inuussutissarsiuteqarsinnaajunnaassapput, Aalisarnerlu pillugu Inatsisartut inatsisaanni § 9 naapertorlugu Kalaallit Nunaanni ukiuni tallimani najugaqavissuullutillu akileraarutitut akiliuteqartarsimagunik aatsaat akuersisummik pissarseqqissinnaapput. Aalisartorlu ilinniagaqarneq siunertaralugu, napparsimaneq assigisaaluunniit pissutigalugit Kalaallit Nunaata avataani najugaqarallarsimappat § 9-mi piumasaqaatinik § 11 naapertorlugu immikkut akuersinikkut aalisarsinnaanermut akuersisummik tunineqarsinnaavoq.

Sunngiffimmi piniarsinnaanermut aamma inuussutissarsiutigalugu piniarsinnaanermut allagartat pillugit nalunaarutit atuuttut naapertorlugit, inuit sunngiffimmi inuussutissarsiutigalugulu piniarsinnaanermut allagartallit nuunnertik Sullissivik.gl aqutigalugu nalunaarutigissavaat, tassunga ilanngullugu kommunimut allamut nuunnertik nalunaarutigissavaat. Kommunimi nutaami piumasaqaatinik naammassinnikkunik, sunngiffimmi inuussutissarsiutigaluguluunniit piniarsinnaanermut allagartaq pigiinnassavaat, taamaallaat najugaqarfigiligaq nutaaq allagartami allassimassalluni. Najugaqarfiup allanngorneranik nalunaaruteqarnikkut piniarsinnaanermut uppersarsaat akilerneqarsimasoq uppersarsaatitut ilanngullugu nassiunneqarsinnaavoq.

Inuit sunngiffimmi imaluunniit inuussutissarsiutitut piniarsinnaanermut allagartallit ilinniagaqarneq napparsimanerluunniit pissutigalugit Danmarkimut nuukkunik, ilinniagaqarnermit imaluunniit nakorsamit uppersarsaammik saqqummiussinermikkut piniarsinnaanermut allagartamik pissarseqqinnissamut immikkut akuerineqarsinnaapput. Tassanili assersutigalugu piniarnermi atortunik peqarnissamik piumasaqaat naammassineqarsimassaaq, tak. piniarneq aallaaniarnerlu pillugu Inatsisartut inatsisaanni § 7.

2. Naalakkersuisut aalisartunik piniartunillu ikilisaaneq arlaatigut anguniarpaat?

2 pillugu) Naami, Naalakkersuisut aalisartunik piniartunillu ikilisaaneq anguniaqarinngilaat.

3. Naalakkersuisut aalisartut piniartulluunniit amerlisarnissaannut anguniagaqarpat? Naalakkersuisut taamatut anguniagaqarunik qanorpiaq tamanna anguniarneqarnersoq nassuiaaqquneqarput.

3 pillugu). Naalakkersuisut kissaatigaat aalisarnermik piniarnermillu inuussutissarsiuteqarnerup imminut napatittuartuunissaa aamma inuiaqatigiinni inuussutissarsiutit pingaarnersariuassagaat, taamaammallu inuussutissarsiummut pitsaasunik atugassaqaartitsisoqarnissaa sulissutigalugu.

Ilisimatitsissutigineqassaaq Aalisarnermut, Piniarnermut, Nunalerinermit Imminullu Pilersornermut Naalakkersuisoqarfimmit 2016-2024-mi umiatsiaararsorluni aalisarnerup ineriartornera pillugu nalunaarusiortoqarsimammat, tassani ilaatigut takuneqarsinnaavoq piffissami pineqartumi umiatsiaararsorlutik aalisartut 147-nik amerleriarsimasut.

Nalunaarusiaq pissarsiarisinnaavat
https://naalakkersuisut.gl/Publikationer?sc_lang=kl-GL.

uani:

Inussiarnersumik inuulluaqqusillunga

Peter Borg

Aalisarnermut, Piniarnermut, Nunalerinermut Imminullu Pilersornermut Naalakkersuisoq